

# Madu kelulut jana pendapatan peneroka



**Shamsiah menunjukkan madu kelulut yang siap dibotolkan.**

→ Keuntungan tampung kejatuhan harga kelapa sawit

PRK

CAMERON HIGHLANDS

P078

26 JANUARI 2019

Oleh Nik Sukry Ramli dan Nazirul Roselan  
cnews@nstp.com.my

► Lipis

**B**ermula hanya dua sarang kelulut pada hujung 2017, peneroka FELDA Sungai Koyan 1, Shamsiah Mohd Said, 68, kini memiliki 27 sarang kelulut yang mampu menghasilkan pulangan sampingan.

Mengusahakan kelulut madu di kawasan sekitar kediamannya, beliau berkata, ia dimulakan sekadar aktiviti bagi mengisi masa terluang.

“Asalnya, saya buat untuk menghilangkan bosan dan apabila ia mula



**Shamsiah bersama anaknya, Mohd Nazri Ismail menuai madu kelulut yang diternak di FELDA Sungai Koyan 1, Lipis.**

menampakkan hasil (pulangan), rasa seronok pula dan disebabkan itu, saya tambah lagi sarang di kawasan rumah.

“Cara penjagaannya tidak terlalu rumit, asalkan banyak pokok bunga-bunga dan herba ditanam di sekeliling rumah, mudahlah untuk kelulut menghasilkan madu yang baik (berkualiti),” katanya.

Shamsiah berkata, pendapatan sampingan diperoleh melalui jualan madu kelulut diusahakannya itu boleh menampung kejatuhan harga kelapa sawit ketika ini.

**Pendapatan sawit tak menentu**  
“Sekarang pendapatan kelapa sawit tidak menentu, tetapi hasil (jualan) madu kelulut ini tidak terlalu lumayan, bolehlah sekitar RM300 hingga RM500 sebulan.

“Saya bukan jual (pasarkan) secara meluas, biasanya anak dan menantu tolong jual di Kuala Lumpur dan Negeri Sembilan,” katanya.

Beliau berkata, antara jenis kelulut yang menghasilkan madu berkualiti tinggi ialah spesies Tora (*Heterotrigona erythrogastra*) dan Itama (*Heterotrigona itama*).

“Ketika memulakan ternakan madu kelulut ini, satu sarang dijual pada harga RM300, kini harga (sarang) RM500 kerana permintaan meningkat.

“Saya menuai setiap tiga bulan bagi memastikan hasil (madu) lebih bermutu. Sekali kutip, dapat dua hingga tiga kilogram (kg)” untuk dijual,” katanya.

Shamsiah berkata, beliau dan suaminya, A Rahman Mad Shariff, 75, mula menetap di FELDA Sungai Koyan 1, sekitar 1975 dan masih mengusahakan ladang kelapa sawit sehingga kini melalui FELDA.

Katanya, semua anaknya berusia antara 36 hingga 48 tahun sudah berumah tangga dan menetap bersama keluarga masing-masing di ibu negara dan Negeri Sembilan.